



扛茶

扛茶，一生人扛有一擺，怕就罇擺哋。過定個時節，新娘愛扛茶；毋過，過定前，一屋下人就愛先無閒哋。愛拜託哪個好命婆牽新娘？愛準備托盤、愛煮板仔圓、愛定桌席，項項都愛先安排好勢。還過，新娘戴禁指個時節，愛坐個高凳仔、踏腳個矮凳仔，有準備好旨？

聽講，頭擺個新娘踏矮凳仔個時節，愛打赤腳，好分家娘看腳趾有短少無；好得，今這下個人都係自家擇、自家選個，早就探(tamˋ)清楚哋，毋使再打赤腳分人看咧。毋過，過定個準備，做盡還係屋下人在該參詳、無閒。該新娘人愛無閒麼個？就，等過定該日，打早疏床去分人梳頭那毛、化妝，等吉時來到，準備扛茶哩啲！

扛茶個時節，對廳下左手析安排過去正換右手片，媒人坐頭前、男家頭爺哀、上輩、且郎，愛照順序坐，最尾一個正係新娘公。好命婆牽新娘出來扛茶，媒人紹介男家頭，這條麼人、麼人。茶杯仔裡肚個係甜茶，甜茶毋好淋到燥燥，人講愛「有食有伸」正做得。男家頭來個人愛湊雙，六儕人算簡單，「七七八八」毋好、十儕人無出頭，盡多就十二儕人。做麼個無愛「七七八八」呢？毋單淨係「七手八腳」毋好，因為一般禮俗，照「生、老、病、死、苦」五隻字輪等來算，七摻八都落在毋好個位所。故所，就算係包禮，一般人乜會跳過七摻八。

食新娘茶個時節，愛企起來，兩隻手兜茶，正係有禮。頭擺人食新娘茶，愛講四句，像係「新娘扛茶笑洋洋，良時吉日進洞房，明年新娘生貴子，個個子孫都賢良」這兜。今這下，罕得有人會講四句哋，毋過，新娘來收茶杯仔個時節，男家頭愛摻紅包放在茶杯仔頂項，安到「砵茶盤」，這種俗還係共樣。也有人係，等新娘收到最包尾，新娘公正來「總砵」，砵一包賁賁、大大包個紅包，乜異好看相。

你問佢識扛過茶無？識啊！有麼個感想？無呢，記得有偷算紅包，還做得。正經有感想個，還係嫁人該日，阿姆飼佢食惜圓，厥目珠紅紅、手緊顫，還緊吩咐佢愛曉得摻人凝家。還過，佢進前就緊問人「做得無愛潑無？」「無人恁仔做哦？」佢在新娘車裡肚，看吾姆拿等該面盆搖一下，分人捉包哋又詐意仔搖一下，厥面盆裡肚該薄薄仔個水，任潑都潑毋出去。一生人嫁有一擺，正經就罇擺咧！

作者：彭瑞珠

☆詞彙學習☆

- | | |
|-----------------------------------|-------------------------------|
| 【扛茶】gongˋ caˋ：訂婚儀式中，新娘端茶向男方親友團奉茶。 | 【男家頭】namˋ gaˋ teuˋ：訂婚時，稱男方親友。 |
| 【罇擺】la baiˋ：足夠。 | 【且郎】qiaˋ longˋ：伴郎。 |
| 【做盡】zo qin：全部。 | 【捉包】zogˋ bauˋ：揭發、揭穿。抓到把柄、小辮子。 |

☆文法學習☆

【怕……】pa……：可能、或許、大概。「怕」，做副詞用，表示猜測。

例1：佢怕去毋得，旨好同佢算落去。（他大概去不了，還不要把他算進去。）

例2：烏天暗地，怕會拚大雨哋！（天昏地暗的，可能要下大雨了！）